

Gobernador di Aruba ta inaugura Proyecto Conservacion di Shoco na Tierra del Sol

ORANJESTAD (AAN): Diasabra mainta November 9, 2019, e auto di Gobernador a para na e golf course di Tierra del Sol Resort. E Honorable Sr. Alfonso Boekhoudt a ser ricibi pa e Gerente General Sr. Cisco Quant y e Presidente di Aruba Birdlife Conservation, Sr. Greg Peterson. Hunto nan a compaña na e "Hole # 14", cu ta e "Signature Hole" di Tierra del Sol. Sra. Natasha Silva, Gerente di Conservacion, y Sr. Gian Nunes, hefe di investigacion di Parke Nacional di Aruba y Sr. David Johnson di "Global Owl Project" a topa cunan na e "Hole # 14", un lugar special unda e empleadonan di Golf Course y voluntarionan di Aruba Birdlife Conservation ya tabata presente.

Casi 3 aña pasa Aruba Birdlife Conservation y Parke

Nacional Aruba a forma un asociacion pa rescata e Shoco di extincion. Nan a busca un socio internacional y a invita e "Global Owl Project" pa uni cu nan den nan esfuerso. Nan a traha un plan hunto y nan a aserca Cisco Quant di Tierra del Sol cu e peticion pa bira nan socio di Aruba su promo proyecto di conservacion di Shoco. E resto ta historia.

Un aspecto fundamental di e proyecto di conservacion di Shoco ta encera ofrece e Shoconan neishinan artificial cu ta poni strategicamente na lugarnan cu no ta na peligro. Durante un periodo di dos aña, 22 neishi artificial a ser poni na varios lugarnan banda di e golf course di Tierra del Sol. Y e bon noticia ta cu e Shoconan ta gusta nan neishinan artificial nobo!

E socionan a acorda cu



Representanten di Tierra del Sol, Parke Nacional Aruba, GLOW y Aruba Birdlife Conservation hunto cu Gobernador.

awor ta e momento propicio pa lansa e proyecto unico aki. Tierra del Sol tabata cla pa fungi como e prome ehempel di Aruba su proyecto di conservacion di Shoco.



Gobernador ta inaugura "The Governor's Burrow" na Hole 14. Di robes pa derecho Cisco Quant, director di Tierra del Sol, Natasha Silva, Conservation Manager di Parke Nacional Aruba, Gobernador Alfonso Boekhoudt, Greg Peterson di Aruba Birdlife Conservation y David Johnson van GLOW.



Gobernador ta ricibi uniform di ABC di secretario di directiva Annette Peterson en docter veterinario/voluntario Stephany Wever.

Gobernador ta un gran amante di naturalesa cu a muestra un interes den e proyecto di conservacion di Shoco for di prome dia. Algun siman pasa, Gobernador a haci un bishita informal na Tierra del Sol pa ricibi mas informacion detaya con e progreso ta bayendo. Durante e bishita aki ela descubri cu un pareha di Shoco a muda pa "Hole # 14". Si, exactamente, e "Hole" mas importante di Tierra del Sol. No falta pa bisa nada cu ta e neishi artificial aki cu a ser scohi pa ta e lugar di lansamento di e proyecto. Diasabra 9 di November 2019, e ceremonia a tuma lugar y a cuminsa cu revela un borchu nobo na golf course. Ya cu e Gobernador a descubri e Shoconan na e neishi aki e lo carga e nomber di "The Governor's Burrow". Pa seya e lansamento, Gobernador a pone e stand di Shoco dilanti di e neishi artificial. Y enberdad mescos cu "Hole #14", di awor en adelante "Governor's Burrow" tambe lo ta number 14.

Ta agradecido na Gobernador di Aruba y na Tierra del Sol cu a pone nan confiansa den e socionan di Conservacion di Shoco. Nos ta gradici e empleadonan di Tierra del Sol pa nan asistencia incansable. Aruba Birdlife Conservation ta extende e sintimentonan di aprecio na su socionan di Parke Nacional di Aruba y "The Global Owl Project" pa nan contribucion na e Conservacion di Shoco na Aruba. Un palabra di danki special na tur cu ta duna nos sosten y mas aun na nos boluntarionan fabuloso.